

欽定剿平粵匪方略

欽定剿平粵匪方略卷一百六十二 丙辰年

九月初二日

丙辰官文胡林翼奏言兼旬以來臣

官文督飭署臬司李孟羣等率兵勇進攻漢陽西門城卡又令綿洵督飭遊擊侯鳳岐等整隊渡河攻五顯廟一帶土城令副將顏朝斌於鸚鵡洲進兵攻其東門八月初九日密派兵勇攜帶旗牌躍登卡牆擲放火彈火箭卡內賊營延

燒數座賊衆大亂兵勇擁入頭卡殺賊數十名
內卡之上亂石下擊兵勇傷亡多名十一日我
兵復分路進攻該逆於西門出大股直撲中路
營盤李孟羣率縣丞袁懷忠等分路抄擊賊勢
披靡斃賊三百數十名奔竄不及入城者復被
我軍殲斃無數時已初更撤隊回營是日誦欽
等攻五顯廟卡斬馘甚多又轟塌頭卡牆數十

丈未能深入十二日夜半南門出賊數隊由破
江口襲我內湖礮船經管帶船勇守備陳慶有
等先期偵知率勇登陸深伏蘆叢迨賊至湖邊
伏勇四起船內連開大礮賊卽敗退十四日臣
官文又親督隊伍派軍功邊又雄等帶三板船
三十號由龍鐙隄入湖轟擊月湖隄賊卡卽由
湖尾駛至五顯廟賊卡後又派遊擊溫發魁等

各帶陸勇攻五顯廟賊卡之前王國才攻西門
橋李孟羣攻龜山尾臣官文督同副將栗襄等
率馬步隊迎勦巴揚阿又率馬隊縱橫血戰賊
敗歸巢又值顏朝斌由鸚鵡洲出隊截擊斃賊
多多而南門出賊尤悍李孟羣等直前迎擊我
軍喊殺正厲忽賊之後隊大亂係陳慶有等飛
駛礮船分隊轟擊賊不期水師猝乘其後遂潰

竄入卡十六十七等日我軍設計誘戰該逆堅
守不出十九日偵知下游賊衆竄至夏家畝地
方已革提督孔廣順派都司王玉琳等帶兵迎
擊賊勢稍卻兵勇紮新洲有投誠之沔陽人邵
忠良據供逆渠石達開等糾集二萬餘人圖竄
沙口澗口救援漢陽當令江甯將軍都興阿督
帶馬步隊馳赴沙口臣官文仍督李孟羣等中

路之師專禦漢陽賊匪臣胡林翼派遊擊張榮
貴等選帶寶勇虎勇渡江合剿一面飛行黃孝
德安等屬豫集紳團練勇嚴加守禦奏入

上命軍機大臣傳諭官文胡林翼曰賊黨上竄北岸該
督等務飭所派兵勇實力堵剿使城外之賊絕其外
援城內之賊斷其接應毋令勾結蔓延至黃州孝感
一帶實爲豫省門戶更當豫飭各屬厚集兵練妥爲

防範堵賊北竄之路官文現在紮營距漢陽甚近著
卽嚴斷賊匪接濟使之坐困一面督飭將弁相機進
攻早圖克復不得曠日持久徒託空言自干咎戾

上諭內閣曰此次水陸各軍進攻漢陽及迎剿下游援
賊均尙得手著官文嚴督各軍乘勝迅圖克復埽蕩
竄匪毋稍鬆懈

同日和春福濟奏言金陵之賊由裕溪口駛入

巢縣安慶一帶股匪又由無爲州陸續赴巢查
巢縣爲江北門戶廬郡藩籬東接長江西鎖焦
湖水陸要衝爲自古必爭之地東關卽古濡須
口咸豐三年駐防兵勇經前撫臣撤調回廬致
東面諸城爲賊占踞現僅吉順一軍駐紮揚徐
山難以進取當茲攻剿得手急宜抽撥精銳迅
殄逆氛臣和春擬帶兵勇由南路進攻臣福濟

擬將廬州防務交藩司畢承昭署臬司恩錫督
同府縣妥爲辦理仍飭丙子鋪等處防堵官弁
實力巡緝卽於二十三日督同嵩瑞孔隆武李
鴻章等自廬州起程二十四日抵柘皋鎮二十
五日親赴湯徐山迤東並巢湖一帶察看形勢
諭令沿河沿湖各團練協助官軍並派李鴻章
兼司其事該民人等遮道歡呼極爲踴躍其桐

城一路現擬酌撥官兵並令知府陸希湜隨同
前往奏入報

聞

同日禮部奏言咸豐六年七月十八日內閣奉
上諭欽差大臣前任湖北提督向榮著加恩開復提督
賞還花翎卽照提督軍營病故例賜卹欽此經兵部
遵

旨照提督軍營病故例賜卹臣部應請照一品官軍營
病故例給與減半葬祭銀兩照例不立傳不入
祠該故員應否予諡之處伏候

欽定奏八

上諭內閣曰向榮著准其予諡該提督統兵數載捍衛
江南分援各郡實爲東南保障並著於江蘇地方建
立專祠以彰蓋績

初四日戊午怡良奏言八月十七至二十二日傳

振邦督帶兵勇由溧陽進發馳抵定埠以上之
南城紮營七座明安泰帶兵繼進秦如虎由建
平進發馳抵定埠該鎮等商定分三路進攻該
逆出巢分拒各路將備兵勇奮力斬馘數百名
賊勢稍卻另有股匪抄我後路參將李定太等
合圍兜剿斷其歸路痛加剿洗壘內之賊正欲

出救明安泰已將頭二三道賊卡焚燬傅振邦
秦如虎分路進攻亦將四五兩道卡內之賊盡
行燒斃遊擊虎坤元首先拔去壩東賊壘之梅
花椿潛伏而進馬永清督勇束草填濠爭先搶
入官弁兵勇一擁而上立將賊壘攻破壘賊燒
殺殆盡都司周天培拔去壩西賊壘之梅花椿
守備秦坤由壘後踰濠撲入接應周天培將壘

內之賊勦淨盡守備于紹昌進攻壩中賊壘
兵勇爬牆而入賊壘亦破勦殺無遺而壩後賊
壘最爲堅固秦如虎督令拔去梅花樁遊擊張
玉良首先衝過濠溝各路官兵勇四路爬牆
拋擲火罐該逆冒死衝出望高淳一路逃竄東
壩肅清至金壇擊敗之賊又竊踞寶堰爲巢穴
並在金角地方結壘爲犄角之勢副將王浚等

統帶兵勇馳赴陶巷鋪分築營盤十一座參將
李若珠等督帶兵勇移紮九里地方嚴堵內犯
之路王浚等督隊進攻該逆隔河迎拒見我兵
威壯盛紛紛敗退餘賊在陳吳趙莊放火搶掠
王浚等分兵三路馳往追勦適有茅莊等村團
練笪熙等率領壯丁數千齊來協助守備黃金
友督率兵勇民團乘勝壓下該逆狂奔鼠竄退

回句容追殺二十餘里始行收隊臣張國樑馳抵陶巷鋪督令王浚等移營進逼該逆聞風惶懼出巢分兩路竄赴句容當將金角寶堰逆壘全行平毀臣張國樑卽督同各營兵勇進紮離句容縣城三十餘里之行鎮地方相機進剿臣現與臣福興臣張國樑往返熟商乘此銳氣飭令秦如虎督兵駐紮東壩兼顧建平傅振邦再

於溧陽防兵內挑帶勁旅千餘名並飭與秦如
虎商酌抽撥所部千餘名連傳振邦原統兵勇
共約六千名卽由茅公鋪高淳一路沿途掃蕩
進取溧水並調明安泰亦於溧陽防兵內抽撥
千名前赴寶堰督同李若珠等由句容南路進
攻臣張國樑俟將黃茅莊逆匪勦洗淨盡卽從
句容東路進攻其金壇地方情形稍鬆有遊擊

李鴻勳統帶兵勇一千九百餘名足資防堵卽
飭虎嵩林統帶川兵五百餘名前赴溧陽會商
傳振邦秦如虎擇要駐紮爲後路援應惟前調
福建廣東官兵尙無來江之期現在大營兵勇
四路分撥堵剿實有兼顧不遑之勢殊深焦灼
所有此次出力將士可否容臣擇尤酌量保奏
奏入

上命軍機大臣傳諭怡良何桂清曰此時東壩已無賊
蹤正宜速將甯國收復則江浙門戶均可嚴密著怡
良何桂清督飭鄧紹良乘此賊勢窮蹙之時速籌攻
克勿再延緩金壇溧陽等處防兵並飭令各該將弁
嚴密防守以便張國樑等進攻句容溧水不致有後
顧之患前調閩粵各軍據王懿德奏邵武需兵防堵
已准其將琳潤一軍暫留該處其陳上國所統閩兵

一千五百名及前調廣東兵四千名迄今尙未到營
著怡良飛檄催提以資助剿

上諭內閣曰東壩寶壩均爲內犯要衝逆賊分股屯踞
意圖窺伺經此痛加剿洗實足顧大局而振軍威此
次將弁兵丁屢破賊壘實屬異常出力著怡良等擇
尤保奏候朕施恩

同日德興阿翁同書奏言安徽來安縣向有棚

民因歲饑煽結多人勾通金陵逆賊於八月二十日來撲六合之施官集距縣城祇二十里該匪等頭紮紅巾旗幟書太平天國字樣經副都統富春派委參領依興阿等酌帶馬隊候補道溫紹原率同守備王家幹等酌帶練勇先期馳往紮定俟匪撲近向前迎勦該匪奔潰又有烏石港及石鼓山匪徒由閒道來撲兵勇乘勝陣

斃一百餘人追殺三百餘人生擒一百餘人餘
匪紛紛回竄臣等當以江浦未復又有粵逆八
月內夾攻六合之說今增此外侮雖被官兵擊
退難保不去而復來已分咨怡良福濟庚長妥
籌勦辦期於速就撲滅至瓜州亟須攻克臣等
與水師總兵陳國泰等密定機宜一遇風便卽
水陸夾攻大舉深入期於一鼓而下不任再有

延宕奏入

上命軍機大臣傳諭德興阿翁同書曰安徽來安縣土匪聚衆滋事竄擾六合縣境雖經官兵擊退仍慮其與逆匪勾通乘閒窺襲自應及早撲滅德興阿等分咨怡良福濟庚長冀其撥兵剿辦惟福濟等正擬進攻巢縣又剿辦豫捻甚爲喫緊未必能分兵前往庚長駐守清江更屬無兵可撥怡良等甫克東壩寶堰

正在得手所調客兵亦尙未到恐難分撥所有來安土匪卽著德興阿等撥兵追勦毋使蔓延至瓜州久稽克復該大臣等擬密會水師大舉深入著卽趕緊會合直擣賊巢不得仍以虛詞延宕致誤事機

初五日

己未

何桂清奏言廣信一郡所恃者生員

郭守謙楊敬資曾守誠三人分帶義勇防勦兼施賊匪疊陷廣昌南豐新城溫溪以後該生等

駐防貴溪卽所以保全廣信已革道員石景芬
忽撤貴溪之防並將廣信存兵及府縣雇募之
練勇盡挑精銳以去而貴溪爲廣信咽喉反置
之不顧該革員帶同楊敬資曾守誠從貴溪拔
隊先行至桂碧地方暫駐其地離貴溪僅三十
里賊氛已入貴溪郭守謙與賊接仗全軍覆沒
該革員並不回援迨貴溪失陷賊匪直趨郡城

該革員所統全軍二千餘人不知何往茲據常
山縣知縣稟稱該革員竟回樂平本籍至浙師
駐紮玉山策應廣信卽兼防徽饒刻下該郡解
嚴而徽饒各邊境已成賊匪往來熟徑常開防
所得力兵勇挑選已空臣實不能再籌現已咨
照饒廷選暫在廣信坐鎮一俟人心稍定卽統
帶全軍仍回玉山駐紮以爲三路策應奏入

上命軍機大臣傳諭何桂清廉兆綸曰石景芬以革員
效力行間宜如何激發天良勉圖報稱乃種種玩誤
實出情理之外該革員已回樂平本籍著何桂清廉
兆綸卽將石景芬提至廣信派員嚴鞫務得確情從
嚴叅辦其所帶兵勇二千餘人並著廉兆綸迅速派
員統帶以資防勦毋任潰散饒廷選現駐廣信著遵
照前旨相機前進收復失陷各城再行折回玉山駐

紮

何桂清又奏言江右甯都會匪勾結粵逆竄擾
廣信攻撲西北兩門貫溪弋陽逆援屬至在郡
城西北連紮賊營七座自玉山至府城餉道不
通臣當卽飛飭繆梓先在玉山常開各處防所
再挑精銳兵勇千餘名前赴廣信爲饒廷選接
應一面添派在省巡防之已革參將師長鑣統

帶虎勇兼程前赴玉山相機防剿並委嘉興府知府李祿麟馳往三衢隨同繆梓辦理防務復飛咨江西學臣廉兆綸速調在建昌防剿之閩省官兵前來會剿八月十四日該逆全股圍撲郡城饒廷選卽令穆隆阿等抄襲其後乘勝掩殺該逆用長梯百餘架直薄城垣饒廷選親督將士在城上施放槍礮轟斃甚多該逆退而復

至我軍分三路迎勦將西北兩門賊壘一律踏
平餉道乃通該逆自毀其東門之壘欲以餘黨
竄往玉山截廣信之後路饒廷選偵知賊情親
督七成隊伍間道繞出賊前迎頭截勦斃賊一
千餘名餘孽望風披靡逃往興安一帶郡城地
面一律肅清查貴州安義鎮總兵饒廷選自上
年統帶閩軍赴浙辦理三衢防勦事宜諸臻妥

協此次廣信之役解圍迅速謀勇兼優可否

賞給勇號以示獎勵署廣信府知府沈葆楨上饒縣知

縣楊昇署廣信營參將榮壽隨同該鎮晝夜登

陴守禦保固城池合無仰懇

天恩俯准將該三員與在事出力員弁兵勇容臣彙案
請獎之處恭候

訓示遵行奏入

上諭內閣曰江西甯都會匪勾結粵逆竄擾廣信地方
經何桂清調派總兵饒廷選馳往迎剿立將各門賊
壘踏平餘匪逃匿郡城地面一律肅清剿辦尙屬妥
速饒廷選著賞給西林巴圖魯名號所有在事出力
員弁兵勇著准其擇尤保奏署廣信府知府沈葆楨
上饒縣知縣楊昇署廣信營參將榮壽固守待援克
保危城實屬出力並著何桂清彙案保奏

何桂清又奏言青陽之賊於八月初二日竄至
太平縣境乘虛入城初十日江長貴督兵直徧
南城各鄉團練聞風響應署太平縣知縣楊裕
仁統帶前進賊由西門竄往焦村江長貴飭令
蘇式敬幫同楊裕仁駐守縣城該署鎮馳赴夥
縣防堵該逆已於十一日竄八羊棧嶺守嶺之
千總周光順把總郭桂林等與賊接戰衆寡不

敵六品軍功孫燮元力戰陣亡賊卽撲入嶺內
竄擾村莊署黟縣知縣王垣糾集鄉團齊心殺
賊江長貴從閒道馳至賊見我軍勢盛卽竄出
西武嶺於十四日潛撲祁門縣城署祁門縣知
縣匡森林帶勇迎擊身受重傷經各勇救護由
閒道前迎援兵而州同銜徐焯從九品銜徐茂
達同時力戰陣亡江長貴聞警先派王恩榮帶

勇進發遇賊於花橋地方王恩榮手刃悍賊十
餘名江長貴馳至督戰益急賊敗入城十六至
十八等日我軍出隊進剿郭桂林猛攻陣亡十
八日江長貴進偪東門之三里岡該匪前來迎
拒我軍爭先擊刺賊勢潰竄王恩榮等已從東
門攻勦入城該逆全股竄出西南兩門江長貴
分兵三路追擊十餘里斃賊百餘名逆黨從黟

坑渚口竄逸江長貴復派隊追勦俘斬數百餘
匪竄往浮梁一帶查江長貴前因東夏兵勇退
縮經臣奏請嚴議茲經張芾派令勦賊連復兩
城深知奮勉其前參應得處分可否懇

恩寬免陣亡之州同銜徐焯等四員請

飭部從優議卹奏入

上諭內閣曰官軍先後克復太平祁門縣城勦辦尙爲

奮勉署皖南鎮總兵江長貴前因兵勇退縮交部嚴
議應得處分著加恩寬免陣亡之州同銜徐焯從九
品銜徐茂達把總郭桂林軍功孫燮元著一併交部
從優議卹

何桂清又奏言臣接怡良來函總兵傅振邦統
帶勁旅三千馳赴溧陽會同明安泰等進取東
場臣卽飛飭秦如虎統兵二千三百名剋期紮

出定埠並派遊擊蔣錫光統兵二千名扼紫鍾
橋仲孫懋統兵二千二百餘名駐守建平以顧
後路嗣傳振邦明安泰秦如虎於八月十九日
先後至定埠會齊次日分路進兵直撲賊營槍
礮連環逆眾紛紛倒地我軍槍過濠溝砍斃及
燒斃逆匪計二千餘名當將賊營三座次第攻
破餘孽四散逃竄又被我軍追殺無遺官弁兵

勇微有傷亡臣查東壩爲蘇皖咽喉今全境業已肅清蘇之溧陽宜荊皖之建平廣德均可毋虞內犯惟是東壩高渚向由江省大營官兵防堵此次東壩克復以後江省仍必派兵駐紮而甯國堅城因兵分愈單日久未下雖經鄧紹良明攻暗襲賊勢已形窮蹙而城內逆黨尙多蕪湖黃池逆援亦未能盡絕乘此兵力稍紓必得

於水陽添紮一營庶於甯國勦辦事宜更有把握臣已檄行秦如虎先將攻克東壩之浙師駐紮定埠力保皖浙門戶並由該鎮察看情形即日分兵進紮水陽杜蕪湖貴池之賊援俾孫懋一軍飭令仍駐建平均聽鄧紹良調度奏入報

十一日
乙丑
和春奏言
臣奉

恩命飭赴丹陽督辦江南軍務卽於九月初六日由三河起程伏查皖北地方遼闊焦湖三河係水陸衝途廬郡爲北面門戶最爲扼要幸廬州舒城三河廬江先後克復是軍務已有轉機今巢縣賊勢甚窮如能得手卽可分兵扼住東關及裕溪口等處實力巡防使該逆無從窺伺則廬城方臻鞏固一面統兵南下進勦桐城兼攻潛太

可以直抵安慶

和春又奏言臣現酌帶皖營官兵前往江南巢縣蕞爾一邑該逆已成孤立鄭魁士會同福濟合力勦辦必可順手查協領多廉所帶青州等兵六百餘名協領玉崑等所帶密雲兵三百餘名並前次原帶來皖之參將朱承先遊擊熊天喜都司李嘉萬知府蕭盛遠刑部員外郎史致

聞

漙等仍令隨赴江南軍營差遣奏入均報

同日德興阿翁同書奏言瓜州賊匪阻水爲固
有大小二口爲運河咽喉口內賊營夾峙憑爲
重險而江南江北兩岸均有賊設礮隄中流金
山又有賊壘故江面必須先爲布置以便徑擣
賊巢八月二十九日臣等督隊分東西兩岸進

攻行至四里鋪已聞上下水師礮聲自遠而近
遙望北固山一帶煙燄燭天知鎮城亦在接仗
我軍蓄銳已久勇氣百倍西岸則副將成明等
由馬橋進侍衛蘊秀等同忠義勇詹啟綸由四
里鋪進直越頭二兩道濠溝呼聲動天火箭噴
筒攢入賊營數處火起瞭臺俱爲飛礮擊倒站
牆賊目大半擊傷跌斃有墜至牆外者賊益匿

不敢出惟於牆隙開放槍礮死拒其在樸樹灣
駐防之兵經富明阿帶同參將王巨孝等由平
橋進營總蘇冲阿等行至雙橋東南見蘆葦中
有賊埋伏卽列隊迎敵賊由葦叢亂放槍礮直
撲前來與我兵槍箭刀矛相錯正酣戰間富明
阿等已帶兵繞出賊後遏其歸路我兵前後夾
攻陣斬執旗賊三名賊驚怖失措投澗死者無

數殺斃約三百餘名賊奪路奔逃適遇馬橋四里鋪游兵截殺無遺卽行合隊而前連燒賊卡棚五座各兵鼓銳拔樁直撲賊壘外濠奈第三重濠引江水灌注又因雨後新漲有十餘丈之寬非土囊木板不能前進當卽撤隊回營東岸則總兵鞠殿華等由東四里鋪之南回水灣搭橋渡過重濠賊穴已閉其敗垣中伏賊二百餘

人經守備王富來等搜出聚殲殆盡副都統銜
烏爾恭額等帶領馬隊直入內濠又分出馬隊
在王家大院接應文煜亦派勇五百名嚴扼沙
頭防賊東竄其回水灣以下遊擊馮化青等帶
領官兵由賊穴東北搭橋三道繞出賊壘之東
穿過蘆葦深林又搭橋二道愈偏愈近施放噴
筒火箭賊俱不出而環壘之第三重濠汪洋一

片無法超越總兵陳國泰與臣等節次會商以
破賊自效先期調集師船是日接臣等密信卽
督帶紅單十船駛抵瓜州搶進大口守口賊匪
四散狂奔我兵槍礮連施斃賊不少站牆之賊
亦皆驚走陳國泰復揮兵登岸意在必克遊擊
黃彬駕三板小船於瓜州東路登岸各帶火罐
燒其浮橋賊衆擁死拒因前途塍埂縱橫雨

後泥滑未能深入焦山水師總兵周上法是日
飭都司鞠耀乾等帶領象鼻艇及頭猛艇作爲
頭隊親督遊擊葉長青等帶領捷廣紅單等船
作爲二隊繼進南岸總兵泊承陞亦派拖罾三
隻隨幫助攻其時前隊師船已直抵金山因搶
進新河七號等口後隊師船亦揚帆徑指金山
聯船向北岸進攻南北賊隄礮彈如織突於南

岸內河闖出新造兩桅大戰船及快划等船襲
襲我師之後各師船因卽搶過兜攻計轟沈黃
旗賊船一隻擊壞賊划數隻復將鎮岸大戰船
擊碎並擊中土隄賊礮臺數座此次水陸將士
踴躍圖功焚舟毀牆殲賊無算已使賊心膽俱
寒是日余萬清亦進攻鎮江疊有捷斬奏入

上諭內閣曰水陸進攻瓜州逆匪四路同時大勝南岸

鎮江官兵亦同日進攻各有斬擒當此南北水陸將士齊心正宜乘機力圖攻克著德興阿翁同書督飭各軍奮勇進取毋稍鬆勁

德興阿翁同書又奏言據派防觀音門總兵陳世忠稟稱八月二十五六等日見有長髮屍骸不可數計由觀音門口內漂流出江內有結連綑縛及身穿黃衣黃鞋者當經探得金陵逆賊

內亂自相戕害首逆楊秀青已被殺死並殺楊
逆黨與多人覈與各營縣所報俱符奏入報

十二日

丙寅

官文胡林翼奏言臣等以漢陽城賊

探知我馬隊兵勇分赴下游恐有偷襲我營接
應外援之舉是以臣官文親督中路之師豫爲
準備八月二十日更餘下游賊衆數千果欲由

間道潛赴瀾口竄撲中路營盤藉圖接應外援
暗襲瀾口我軍測其詭謀同時擊退二十一日
夏家畝賊盡下遁大股屯踞新洲下數十里之
團風鎮一帶都興阿籌議分路進剿自帶參領
雅明阿馬隊一百名由中路進孔廣順率都司
王玉琳步隊千名繼之營總多隆阿帶馬隊一
百名由淋山河進都司方映川率步隊千名繼

之黃州府知府許賡藻帶勇由鷄子湖進營總
巴依爾率呼蘭馬隊繼之營總訥依綳阿馬隊
會合黃岡縣知縣葛致遠帶勇由羅家溝小路
抄入大江內湖水師列陣以俟臣胡林翼已派
遊擊張崇貴帶勇二千四百名渡江助勦我軍
至團風鎮該逆先時下遁都興阿遂督隊行抵
鵝公鎮追及落後之賊數百名盡行斬殺又追

至軍蒲山及菜田迴龍山一帶先時逃賊踉蹌
下竄生擒賊匪數名臣連日督各路兵勇商攻
漢陽城卡二十七日該逆忽於城上及龜山前
後分布陣勢自西門外梅子山出賊二千餘分
兩路抗拒我軍齊力掩殺斃賊多名李孟羣等
乘勝追過梅子山奮力衝殺斃賊百餘名賊卽
敗竄回巢訊據獲賊供稱是日漢陽城內係約

會武昌過江賊匪二三千人助戰意在竄擾大營後路解其城圍不期大受懲創等語查該逆踞守漢陽環山帶水又復深溝高壘易於堅守我軍雖勇氣百倍而難於仰攻馬隊逼近城卡又未得展其長現仍嚴遏外援以蹙之分布勁旅以困之誓欲盡殄羣醜克復堅城奏八報

十六日

庚午

怡良奏言傅振邦克復東壩後探知

高淳縣治已爲賊踞並於大橋地方修築石壘
一座爲其巢穴傅振邦卽派參將李定太等管
帶馬步兵勇銜枚疾走親督大隊相繼而進八
月二十三日辰刻馳抵縣治適該縣文武各官
督帶鄉團會合助剿該逆猝不及防又無險可
守紛紛敗潰竄入石壘閉門抗拒李定太等一

面縱火焚燒沿湖蘆葦一面分兵合圍奮力攻
擊該逆始猶抗拒繼見我兵陸續趕到由壘後
逃往湖邊李定太等乘勢攻破賊壘追至湖濱
轟燒賊船數十隻餘賊駕船逃出大江高淳縣
治肅清傳振邦卽調溧陽防兵千名移防高淳
卽步步爲營自茅公鋪進紮蒲塘仍知會虎嵩
林由上興埠進紮分界山會合進取溧水其東

壩地方臣本飭秦如虎帶兵扼守嗣何桂清檄
飭秦如虎回紮定埠當飭新任湖北提督德安
帶兵勇二千餘名馳赴東壩防守張國樑於埽
蕩寶堰賊巢進紮句容之行鄉鎮後派副將王
浚等進攻黃茅莊賊營分兵左右夾擊該逆首
尾不能相顧竄入枝堯里巢穴二十五日張國
樑親督隊伍移營黃土橋賊由黃茅莊遁回句

客張國樑在張家莊劉定岡等處紮定營盤離
句容縣城均祇六七里現擬剋日進攻奏入

上諭內閣曰逆匪占踞高淳總兵傅振邦親督大隊攻

破賊壘追至湖濱轟燒賊船數十隻高淳一律肅清
遂卽進取溧水總兵張國樑亦於是日進攻黃茅莊
枝堯里巢穴移營近徇句容縣城剋日進剿著怡良
卽飭該總兵等迅速圍攻以期漸次掃蕩盡殲羣醜

同日何桂清奏言探報金陵賊首於七月二十
二日起閉城自相戕害首逆楊秀青已被韋逆
殺斃凡楊逆黨與均經被殺一月有餘尙未開
城等語如果屬實則丹陽大營官兵不難進取
皖南江右皆爲賊匪去路防剿更形喫緊現咨
各路加意嚴防奏入報

十七日

辛未

廉兆綸奏言遵查已革道員石景芬

七月到郡臣令督同郭守謙楊敬資曾守誠帶

勇駐守貴溪以防撫建饒三郡之寇及廣昌

逆匪擾及瀘溪時臣在河口當飭石景芬相機

剿辦該革員卽與郭守謙等商定進紮繞橋以

扼要隘於八月初三日先後拔營行至桂碧地

方探知匪蹤僅距桂碧五里隨一面探催郭守

謙之兵一面於初四日出隊迎敵獲勝賊遂改竄官莊一路向貴溪而去郭守謙當於五鼓拔營前進獨當官莊一面行數里正與賊遇三戰三勝追過張家橋大股賊匪四起郭守謙以衆寡不敵中矛陣亡賊遂竄至貴溪石景芬等救援不及擬繞出賊前先據河口以爲截勦之計卽與楊敬資曾守誠連夜前進初五日抵弋陽

之港口地方賊衆大至遂致潰敗石景芬當卽折回樂平湯敬資傷勇最多僅以身免曾守誠身亦受傷伏思石景芬當瀘溪有警旣擬進據繞橋隘口而拔營前後參差致彼此不能救應及郭守謙陣亡尙統兵勇千餘可以一戰乃以偵探不實猝遇大股悍賊卒致敗潰失挫之後不思繞道急赴廣信轉因道路梗塞折回樂平

原籍實屬謬妄應請

旨將已革道員石景芬發往軍臺效力贖罪訓導楊敬
資曾守誠同時挫敗咎亦難辭楊敬資擬請革
去訓導仍留廩生曾守誠擬請革去訓導仍留
附生責令收集餘勇力圖補救陣亡人員容臣
查明請卹奏入

上諭內閣曰石景芬駐防貴溪賊至不能援應又於兵

勇敗潰後私回原籍實屬謬妄右景芬著卽發往軍臺效力贖罪其同時挫敗之訓導廩生楊敬資附生曾守誠均著革去訓導仍留廩生附生責令帶勇以觀後效陣亡員弁著廉兆綸查明請卹

十八日壬申曾國藩文俊奏言八月初一日僞指

揮黃姓糾集臨江奉新安義武甯義甯各處逆黨併合瑞州城內大股號稱四萬四路擁至直

撲我軍湘營以數人翼蔽劈山礮俟其偏近擊
之賊陣大亂悍賊衝出重圍者近五百人殲斃
二百餘人其大隊分投擒斬窮追三十里而返
初三日僞將軍石姓自九江來援勒令敗賊仍
回瑞州於東北大路立營五座與城內之賊爲
犄角楚軍劉騰鴻普承堯與省兵營務處彭山
峴羅萱等會商速戰初四日黎明出隊該逆纔

擁而至待其撲近乃發劈山礮殪其賊目賊稍
卻又近又殪凡六七次賊氣稍沮省兵躍馬衝
陣各營齊進賊遂敗退劉騰鴻破其大壘一座
各壘驚惶又連破四座敗賊擁聚一處我軍以
一隊橫截之紛紛四竄追殺數里日暮收隊得
此兩戰軍心大定援賊竄歸各處省城之路無
梗江西兩湖遂獲疏通初六初九十一二等日

接戰疊勝嗣後小有斬獲二十六日南城出賊
千餘護礮船而上抵湘營之對岸北城西門出
賊約二千橫列隄上撲省兵之營劉騰鴻以礮
轟南路之賊而令劉連捷劉芳貴由西南截擊
省兵得勝軍出擊北路之賊斃尤悍者十餘名
我軍亦傷數人二十七日奉新援賊復至瑞州
劉騰鴻令省兵各營靜鎮以待以湘後寶中營

直擣中堅自帶親兵堵擊南城將賊之第二隊
衝開其第一隊亦被我軍截斷省兵彪勇一千
名益以義武勇七百名回勦新昌上高相機規
復奉新安義靖安等縣先是吳坤修等於七月
二十五日重復新昌縣派員於二十八日重復
上高縣暫留數日搜捕餘匪八月初八日行抵
奉新至縣城北門之獅山我軍高據山巔對城

轟擊賊忽繞東城而出直撲我營被我軍殲斃
百餘人十一日安義靖安援賊大至均被我軍
圍殺紛紛逃竄十三日吳坤修飭令守備羊瀛
等堅守營壘自帶各勇馳勦靖安該逆傾巢逃
竄截殺後隊之賊甚多卽日收復縣城十六日
復帶各勇馳勦安義銜枚渡河由南門梯城而
上該逆開北門而逃吳坤修進城安民次日仍

返奉新所有尤爲出力人員先行開列應請立
沛

恩施以示鼓勵奏入

上諭內閣曰江西瑞州賊匪糾集臨江奉新安義武甯
義甯逆黨合城內大股分路來犯兵勇奮力勦殺大
獲勝仗八月初三日僞將軍石姓自九江來援敗賊
仍回瑞州楚軍劉騰鴻等於初四日出隊進攻追殺

數里踏平賊壘吳坤修等先於七月間復將重踞上
高新昌之賊勦除淨盡收復兩縣城池遂於八月初
八日行抵奉新十三日收復靖安十六日收復安義
此次出力員弁均能奮勇殺賊自應立沛恩施都司
彭山岷守備萬泰均著賞戴花翎訓導羅萱著以知
縣分班選用並賞加知州銜千總滕加洪著以都司
歸湖南儘先補用把總詹榮清著以守備歸湖南儘

先補用外委黃純珍黃在玉均著以藍翎把總歸湖
南永州鎮標補用其奮勇捐軀之外委黃兆麟著照
千總例議卹

十九日

癸酉

安徽巡撫福濟署壽春鎮總兵鄭魁

士奏言查無爲州城被賊占踞已逾三年之久

臣福濟春間派知府李元華在巢縣一帶辦理

團練該州紳董來營謁見臣復面爲開導並寫

告示凡城內良民被賊裹脅情願殺賊立功者
破城之時均頭紮白巾爲記令兵勇縛於火箭
上射入李元華卽委未入流李華封等帶勇一
千五百名往該州進剿復派勇五百名作爲接
應我軍由盛家橋一路行抵開城橋距州四十
里有悍賊數百名擄掠民糧下河裝載出其不
意四面燒圍悉數殲斃二十九日擇得涼亭地

方紮營屯駐正在督夫築壘忽西門出賊數千直前攻撲李華封等督勇各據山岡俟其將近連開槍礮將執旗賊目擊倒餘匪卻退不逾時又遽擁而上夏禹疇等一軍由左抄襲吳起齡等一軍由右環攻逆勢不支紛紛奔竄九月初一日南門西門共出賊二千餘人分襲營盤該員等嚴陣以待派勇目李時中帶兵迎勦斃賊

不少餘賊由獨山竄去初二日李時中等攻南門外委梁士雲等攻西門外委汪龍化等攻東門其北門一路派兵勇節節埋伏李華封等往來接應先將東門沿城賊房縱火焚燒西門之兵將柴草堆積門闕一面放火一面豎立雲梯城上矢石如雨急切不能攻破忽南門喊聲大作賊疑我軍由南門攻進調隊南趨汪龍化由

西門攀越而上衆勇蟻附登城東南北三門一
齊奪入由南北二門逃去之賊復經我軍跟勦
暨沿途民卡團練截殺約一千七八百名遂將
無爲州城克復無爲州知州林蘭前因州城無
兵堵禦致被賊匪竄入此次隨同克復功過尙
足相抵合無仰懇

天恩將林蘭開復原官仍以知州留於安徽候補奏入

上諭內閣曰安徽無爲州城久被賊踞經該撫派委知府李元華督帶練勇由盛家橋等處進剿隨將州城克復勦辦尙爲得手福濟等卽嚴飭水陸各軍合力堵剿以冀肅清前任無爲州知州林蘭此次隨同克復功過尙足相抵著准其開復原官仍以知州留於安徽候補

福濟鄭魁士又奏言八月二十六至九月初四

等日賊衆二千餘人在草嶺列陣抗拒當經
督飭嵩瑞等分投迎勦盡力搜殺將賊壘踏平
進擣西門沿途奪獲礮臺七座賊卡十餘處踏
毀賊營一座北門西門南門各營已層層進紮
臣等當激勵將士設法進攻並嚴防巢湖賊衆
來援

福濟鄭魁士又奏言查巢東四十里東關地方

卽古之濡湏口爲巢湖出口第一要隘賊於河
南北岸安營設卡並於古將臺上築大石城一
座外掘深濠四道與巢城犄角臣等密派編修
李鴻章募勇前往該員卽飭千總苗順清等招
集巢含義勇一千二百名由清溪馬鞍山一路
兼程馳抵東關山下急攻東北面賊卡該逆蠶
擁迎拒我軍乘銳進攻銃傷悍賊多名立毀賊

卡逆衆退守石營死拒苗順清指揮衆勇攻營
分隊直擣西南賊卡援賊沿山竄至耿思義帶
隊迎擊殺賊數十名將賊匪大隊壓下臣等諭
令趕緊圍剿一面分撥兵勇派守備桂五等管
帶由閒道馳赴運漕截其歸路一面親率輕騎
百餘由北路小徑馳往督攻九月初七日行至
西山驛據李鴻章稟報該練勇趕緊環攻槍過

第二道濠溝後隊乘勢掘斷外濠將積水一洩而空正欲仰攀而上南岸賊船忽繞出我軍之後撲救賊營苗順清等槍礮連環斃賊不少糾集民夫各帶鋤鍤在北岸石城對面挖營計圖圍困分飭耿思義等密帶各勇束草結茅潛至城濠乘風引火周圍梅花椿竹籤日久乾枯觸火卽燃時風色甚緊石城西北門樓均被延燒

逆情驚駭苗順清踴躍登城帶領衆勇刀矛並
進直擣中堅逆屍徧地其越牆竄出之賊紛紛
投水而死南岸之賊見勢不支棄營逃竄至王
海渡一帶遇我伏兵縱橫攔截直追至運漕而
止查東關要隘巢賊實恃以爲援賊匪全力所
爭我軍屢攻不克今以三年死守之賊巢毀於
一旦此皆仰賴

天威民兵合力得以喪逆膽而絕賊援所有出力員弁
兵勇容彙入克復無爲案內擇尤保獎奏入

上諭內閣曰官軍攻勦巢縣奪獲賊壘並派兵克復東
關所有出力員弁著福濟鄭魁士彙入克復無爲州
案內酌量保奏巢縣賊勢已孤並著福濟等督飭將
士迅圖攻克

二十六日

庚辰

福建提督秦定三奏言桐城久被

賊踞臣督同將弁兵勇馳赴東門外陳家鋪相
度營基正在空濠築壘該逆突出大股來撲經
伏兵截殺逆衆潰逃臣飭令兵勇趕將營牆培
固濠溝挑深自九月初一至十二等日我兵直
撲東北賊營搶過內濠該逆踞牆死抵突於南
門出賊一股臣卽派兵堵截東門又出大股蠶
擁抄圍復派兵馳往迎擊殲賊百餘名賊衆相

率潰逃我軍出隊攻城直抵城邊左右賊壘大
股並出旋從東南兩門分三股齊來撲營該逆
見中路無隙可乘西路山谷又被我兵扼據遂
糾黨東馳勢欲抄我後路官軍奮力進攻該逆
紛紛敗逃連日探得安慶潛山太湖援賊及各
路殘賊俱竄入桐城意圖死守以顧安慶後路
臣所帶貴州兵僅千名按成出隊不過五六百

人義勇徒壯聲援難期實用屢經函商撫臣福
濟鎮臣鄭魁士撥兵相助覆稱須俟巢縣克復
始能撥兵來桐伏思安慶瀕臨大江爲皖省關
鍵而桐城爲安慶第一門戶鄭魁士由皖左進
勦臣由皖右進攻若早得手卽由潛太宿霍截
斷賊援直達安慶控制長江皖省全局已有把
握關繫良非淺鮮仰懇

天恩飭下福濟鄭魁士速撥馬步精兵二千名星夜來
桐以利攻剿奏入

上命軍機大臣傳諭福濟鄭魁士曰秦定三進攻桐城
連次接仗安慶潛山太湖之賊紛紛來援所統官軍
僅一千名兵力太單著福濟鄭魁士挑選得力兵勇
二千名派員帶赴桐城聽候秦定三調遣儘不能足
二千名之數亦須挑派一千數百名前往以資攻剿